

Protocol no. 108**Sezzüda da lündeschdi, 25 lügl 2011 – 20.00 – 23.15**

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Claudia Luppi (protocol)

Protocol

Il protocol no. 107 da la sezzüda dals vain approvà.

943 1**SGÜREZZA PUBLICA****Preschantaziun d'ün concept provisoric a regard l'organisaziun in cas da catastrofas**

Il manader tecnic Jon-Curidin Felix spiega al Cussagl cumünal cha davart il Chantun vegna pretais dals cumüns ün concept per superar catastrofas. A man d'üna preschantaziun muossa Jon-Curidin Felix co ch'ün concept füss fabrichà sù per esser confuorm a las pretaisas dal Chantun. Parts indispensablas e da basa pel concept sun:

- a) la ledscha
- b) ils dovairs
- c) ün inventar dals privels pussibels
- d) l'organigram dal stab
- e) ün schema d'alarmaziun
- f) ün inventar dals mezs d'agüd pel stab.

Il Cussagl cumünal piglia cogniziun da la preschantaziun e da al manader tecnic l'incumbenza d'elavurar ün concept concret pel Cumün da Sent ed implü la ledscha correspondent a man da la radunanza.

944 740**SUNTERI E SEPULTÜRAS****Revocaziun da fossas**

Il Cussagl cumünal piglia cogniziun da las explicaziuns dal manader tecnic a regard l'andamaint in sunteri. Tenor il reglamaint da sepultüra e sunteri art. 17 pon las fossas gnir revochadas davò ün pos da fossa d'almain 25 ons. Pel on 2011 esa previs da revochar las fossas no. 177 fin e cun no. 198 illa terza lingia sura a schnestra. Il Cussagl cumünal da l'acconsentimaint da far tenor art. 19 dal reglamaint la publicaziun da la revocaziun da fossas aint il mas-chalch ed aint il fögl official dal Chantun Grischun e da comunicar la revocaziun a la parantella pertocca tras charta.

945 021**FABRICA****Jachen Zanetti – Sistem fotovoltaic sül tet da la stalla – Pedra Grossa**

Il Cussagl cumünal decida d'inviar la dumonda da fabrica in sen positiv a Cuaira per la procedura da BAB.

946 021 FABRICA
R. e A. Folini – Müdamaint da las abitaziuns, plan terrain –
Curtin 17

Sün dumonda da la famiglia Folini da müdar duos abitaziuns plü pitschnas in ün'abitaziun gronda decida il Cussagl cumünal da dar il permiss da fabrica seguaintamaing:

1. Tenor la dumonda inoltrada e fatta buna.
2. Taxa da trattamaint fr 120.—

947 021 FABRICA
Georg Salomon – Uesch illa foura da zocca – Curtin

Sün dumonda da Georg Salomon da far ün üsch aint illa foura da zocca e d'utilisar quella in avegnir sco magazin decida il Cussagl cumünal in assenza dal patrun da fabrica da dar il permiss da fabrica seguaintamaing:

1. Cun procedura d'annunzcha
2. Taxa da trattamaint fr 50.—

948 021 FABRICA
Jon Carl Rauch – Sistem fotovoltaic sül tet da la stalla – Crusch

Il Cussagl cumünal decida in assenza dal patrun da fabrica d'inviar la dumonda da fabrica in sen positiv a Cuaira per la procedura da BAB.

949 021 FABRICA
Jachen Andri Schmidt – Sistem fotovoltaic sül tet da la stalla –
Pradè

Il Cussagl cumünal decida in assenza dal patrun da fabrica d'inviar la dumonda da fabrica in sen positiv a Cuaira per la procedura da BAB.

950 021 FABRICA
Flurin Nuotclà – Chamonna da üert – Saglina

Sün dumonda da Flurin Nuotclà per pudair eriger üna chamonna da üert decida il Cussagl cumünal da dar il permiss da fabrica seguaintamaing:

1. Cun procedura d'annunzcha
2. Taxa da trattamaint fr 50.--

951 021 FABRICA
Curdin e Sandra Roner - Prolungaziun dal permiss da fabrica
dals 7 mai 2008 per sistem fotovoltaic - Tuffarolas

Il Cussagl cumünal decida sün dumonda inoltrada da Curdin e Sandra Roner da prolungar il permiss da fabrica dat als 7 mai 2008 causa cha'l retardimaint dal fabricat nun es gnü chaschunà da la famiglia Roner dimpersai da l'uffizi federal per energia.

952 012.318.02 Proget fusiuns
Contribuziun iniziala pel proget da fusiun da cumüns –
Credit da fr. 10'000.—

Il capo spiega cha per pudair surdar l'incumbenza ad ün perit per ün proget da fusiun da cumüns, hajan ils cumüns interessats s'abinats da metter a disposiziun üna contribuziun da fr. 10'000.--.

Il Cussagl cumünal decida da dar liber il credit da fr. 10'000.—

954 800 ALPS E PAS-CHS
Società d'alp e chascharia / vachas mamma – Dumonda per ün
reglamaint da tarifas unifuormas per alpagnar muvel d'utrò

La società d'alp e chascharia e la società da vachas mamma fan insembel la dumonda scha'l Cumün nu pudess incumbenzer il consulent agricul da s-chaffir ün reglamaint da tarifas unitarias per alpagnar muvel d'utrò.

Il schef da pauraia spiega ch'el haja consultà al consulent agricul a regard la chosa e ch'els sajan gnüts a la conclusiun ch'ün tal reglamaint nu saja bod gnanca pussibel da s-chaffir causa chi mancan indicaziuns concretas a regard il muvel chi vain alpagnà d'utrò, ils vehiculs pels transports e las alps pertoccas. Il schef da pauraia ed il consulent agricul fan la seguainta proposta: Ils respunsabls per las differentas malgias ston dar cuntschaint minch on fin la mità da schner, che muvel e quant muvel chi varà da gnir alpagnà d'utrò la prosma stà. In basa a quistas indicaziuns convochescha il schef da pauraia in nom dal Cumün üna sezzüda culs respunsabls da tuot las malgias (società d'alp e chacharia, società da vachas mamma, società da bescha) e cul consulent agricul. In quella sezzüda d'essan lura gnir fixadas las cundiziuns e las tarifas tenor las premissas actualas.

Il Cussagl cumünal decida da proseguir in quista chosa tenor la proposta dal schef da pauraia.

956 650.365 Trafic regional
Dumonda per üna fermativa da Posta a Stron

A regard la dumonda entrada per üna fermativa da posta oura Stron ha il Cumün tut sü contact cul respunsabel dal trafic public da l'uffizi d'energia e trafic dal chantun Grischun, sar Peter Sprecher. Tenor sar Sprecher nu vain per la Posta in dumonda da far oura Stron ün fermativa e quai our da plüs motifs ch'el spiega detagliadamaing in ün mail adressà a sar Riet Denoth dal servezzan d'autos da posta a Scuol

Il Cussagl cumünal decida da dar resposta analog al cussagl da l'uffizi da trafic chantunal e da na perseguitar inavant la dumonda d'üna fermativa da Posta a Stron.

958 79 PLANISAZIUN DAL TERRITORI
Procedura da consultaziun dal plan directiv

La Pro Engiadina Bassa da invista als cumüns i'l plan directiv per la procedura da consultaziun. Il schef da planisaziun orientescha chi saja tenor quist plan directiv previs da dovrar üna foppa a Chanals sper la via chantunala chi as rechatta in possess privat sco eventuala deponia per material da s-chav. Davo avair discussiunà la chosa, decida il Cussagl cumünal da propuoner a la PEB giò Panas-ch Sura amo ün' ulterieur lö per üna deponia.

959 VARIA

Il capo da liber la tractanda „Varia“ da la quala nu vain fat adöver.

L'actuara: